

鄭庭許

雲 幃 氏

邨 規 雜

貽

範 錄 謀



三三三

三三三

三三三

三三三

三三三



許  
雲  
邨  
貽  
諫

許相卿撰

中  
華  
書  
局

叢書集成初編

鄭氏規範（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一  
統一書號：一七〇一八·一五一

許雲邨貽謀

鹽邑志林第二十七帙

鄭端胤

黃岡後學樊維城彙編

後學姚士麟訂閱

劉祖鐘

治家先分嚴而後教行家人所以吉嚆嚆吝嘻嘻也

大宗祠堂子孫水木本源之地謁必恭肅

廟室俗節同門

內外祭必誠敬

分至忌辰合小宗親未盡男子長幼

如或苟且怠玩

自非先人肖子禮成會餞

子孫過三十人小宗各助一牲

敦親睦

議贍卹講治生程教子勸善規過絕毋齒及一切

人過惡陰私

大宗子有君道合宗親疎長幼皆宜依向推崇匡  
導衛翊吉凶必咨宴會必先百世永敦強幹弱枝  
之義宗子尤當爲世祀家聲自重強學厲行動必  
由禮抗顏守則以倡宗人

古者教道賢豫今來教子宜自胎教始婦妊子者  
戒過飽戒多睡戒暴怒戒房慾戒跛倚戒食辛熱  
及野味宜聽古詩宜聞鼓琴宜道嘉言善行宜閱  
賢孝節義圖畫宜勞逸以節動止以禮則生子形  
容端雅氣質中和及嬰孩懷抱毋太飽煖寧稍饑

寒則肋骨堅凝氣岸精爽毋飾金銀珠玉綺繡以  
導衒侈以召戕賊及能言能行能食時良知端倪  
發見便防放逸故孔子曰蒙以養正聖功也言常  
教毋誑行常教後長食常教讓美取惡衣常教習  
安布素禁羨華麗及就傳時知慧日長須防誘弱  
慎擇嚴正童子師檢約以灑掃應對進退儀節勿  
應虛文故事一皆身教躬習倡之俾自有樂然趨  
命躍然代勞意

教子弟必慎擇師友待師友當備盡誠敬賢達遠  
必資遣遊從近令恭勤延訪後生常親禮法士熟

聞道義言漸染薰蒸日與之化忽不自知其入於高明矣非類交游痛懲嚴禁

生子質敏才俊可愛勿喜便思豫加檢防痛抑文藝辨給祇令學禮讀書陶習謙晦慎厚性情禁絕浮誇傲誕者游處如此十許年庶成美器否則取禍及親可懼之患非一

士幼而績學業以堯舜君民爲志壯而入仕固當不論崇卑一以廉恕忠勤報國安民爲職持此黜謫何愧如或貪酷阿縱負國辱家貴顯祇重罪愆合宗告祠削譜勿齒於族

子弟性資拙鈍莫將舉業久擔早令練達公私百  
務大都教子正是要渠做好人不是定要渠做好  
官農桑本務商賈末業書畫醫卜皆可食力資身  
人有常業則富不暇爲非貧不至失節但皆不可  
不學以延讀書種子惟不可入僧道不可作書筭  
手毋充門隸毋作媒人毋作中保人毋爲贅壻毋  
後異姓

男女議婚須及壻婦成童上下擬人品於其家法  
占性行於其父母兄弟凡屬刑殘亂逆勢要富豪  
世有惡疾者勿議儒素衣冠量宜成約惟盡禮毋

徇俗毋論財

婦來三月內女生八歲外授讀女教列女傳使知  
婦道然勿令工筆札學詞章

男十歲勿內宿女七歲勿外出

凡子事父老必立侍暑必具衣事諸父未冠婚勿  
侍坐蓋父子分不可狎狎則慢然恩不可簡簡則  
疎閨門之內肅如爾懇如爾

主婦職在中饋烹飪必親米鹽必課勿離竈前女  
婦日守閨閤躬習紡織至老勿踰內門下及侍女  
亦同約束如有恣性越禮遊山上塚賽神燒香街

露體面殊非士族家法子孫必泣諫之父兄丈夫必痛遏之

家人離多由婦人婦人離多由黠婢婦勿聽婢語男勿惑婦言雍睦其可以漸敦已夫

毋養幼婦毋贅女婿

妾有無子女勿容持家事掌家財

僕婢傳言出入內門年及十二更以少者

尼媼牙媒婆唱詞婦穢行隣婦勿容入室

吾家書生門戶世無大富貴抑思神害過盈物忌太盛後人婚姻不可慕勢利仕宦不得過金紫才

過便思引退奴婢毋出百人良田勿踰十頃畜財  
及萬以擬吉凶緩急不啻此以義散其餘不及此  
勿以非義求其足

諺有之曰富貴怕見開花此語殊有意味言已開  
則謝適可喜正可懼爾今有方值豐亨便生驕溢  
喜筵慶賞過飾婚喪伎樂聲容沸騰傾動僕器服  
食珍麗整齊勝絕鄉邦光暎門戶蓋是謂已夫無  
德富貴謂之不祥宜急懼思何暇誇侈其他凡屬  
逞術咸此類耳子孫有是真惡消息亟加欽抑差  
緩敗傾又若約而爲泰時屈舉羸則旦夕覆亾之

道也

內外服食淡素恒存儒酸氣味在常服葛芋丹褐  
土絹綿紬非婚祭公朝不衣羅紈綺縠常食早晚  
菜粥午食一般非賓祭老病不舉酒不重肉少未  
成業酒毋入唇絲毋掛身

器用但取堅整舟輿鞍轡但致遠重勿競雕巧絢  
麗以乖素風

祖傳琴書故物慎勿輕視好食人

病求良醫毋計小費遠勞而輕遺體地訪精術毋

惑星卦尅應而貽隱禍

精術鮮按書而卜筮決之

平居寡慾養身臨大節當達生委命治生量入節用徇大義當芥視千金之產

以吝爲儉以刻爲嚴以諂爲讓以傲情爲厚重以猥黠爲聰明以鬪茸爲寬大何啻千里

暴慢危親于謁辱身誇已長可恥幸人災不仁能忍事乃濟有容德乃大古言大丈夫當容人毋爲人所容人有不及可以情恕非意相于可以理遣達識名言書紳顧諟可也

韓魏公曰內剛不可屈而外處之以和事無不濟試思處事著力全不在面皮上

歌舞俳優鷹犬蟲豕

鸚鵡鵝鴿鵪鶉  
鴉促織之類

劇戲煙火一切

禁絕雖樂賓怡老娛病亦永勿用以杜賭博姦盜  
爭訟焚蕩之隙且防小子眩惑耳目蠱蕩志習荒  
廢學業後患猶未易殫言

家有好賭好淫好酒好燒煉黃白好造作風水好  
妖妄技術好奸欺書算好逞勢專利好狠鬪健訟  
好交結官府好競勝土木凡喪德敗家者家長先  
痛絕其端於長泣諫於少切責務須委曲開喻誠  
惻感動

嫻親饋遺歲只一往渠來亦只一受再必卻之慶

弔有事勿拘

親舊假貸須只量力捐助以盡吾心勿出本圖利  
以生後隙孤嫠婚喪誣枉困甚者尤必憫惻援濟  
然涼約而矯情市名豐餘而觀囊膏施皆非理也  
但能施慎毋德色爲鄙丈夫

燕會親賓物意務必雅潔慇懃致其誠敬然勿固  
強以酒使之失言喪儀成疾侮薄孰甚焉歡洽勸

侑則令子姓考鐘鼓歌古詩爲樂

取古詩意義與時事倫類如七

月鹿鳴棠棣伐木車牽賓筵之類及漢魏以來性情之正者

近世淫聲悉屏不

用於凡嘉事皆然

毋以小嫌而疎至親毋以新怨而忘舊恩

隣里歲時饋燕急難貸卹必洽歡盡誠

秋成穀賤量家餘力糴若干石別儲遇歉時價  
糴存糴本以美貸鄉鄰之饑乏者券約豐償免息  
連歉則展期候豐不費之惠也

寧人欺毋欺人寧人負毋負人

衰榮無常彼此更共本由天運如此富貴在我何  
足驕在人何可妬妬與競於彼何損徒自壞心術  
長過惡耳若夫處世爲大丈夫造道爲聖賢此則  
由我不可讓人性均一天也當思與人同歸於善